



**Corpus Juris Canonici, Per Regulas Naturali Ordine
Digestas, Usuque Temperatas, Ex Eodem Jure, Et
Conciliis, Patribus, Atque Aliunde Desumptas, Expositi**

Opus, Tum In Rebus Obscuris Claritate, Tum Dispersis Collectione ac
delectu, in contrariis conciliatione, eximium, simulque Indicibus ac
Præfationibus, Notisque quamplurimis & exquisitis illustratum, ; In Tres
Tomos divisum

Complectens Prolegomena Ad Jus Canonicum In Se Et Universim
Consideratum

Gibert, Jean-Pierre

Coloniæ Allobrogum, 1735

Observationes in Cap. X. de Electione Prælatorum.

[urn:nbn:de:hbz:466:1-74413](https://nbn-resolving.org/urn:nbn:de:hbz:466:1-74413)

quas Jurisdictio immediatè acquiritur, desumuntur ex defectu conditionum requisitarum ad præscriptionem; proindè inutiles sunt; quando enim dicitur, præscriptione acquiri Jurisdictionem, agitur de præscriptione legitima.

Titulus, quem, Autor antè *Regulas* sequentes collocat, significare videtur, cum sermonem de causis acquisitionis Jurisdictionis intermittere. Nihilominus hæc *Regulæ* ad idem argumentum reducuntur; nam colligit in *Tertio* casus, in quibus Dicoesani Suffraganeorum Jurisdictioni Archiepiscopi sunt obnoxii, & hic exercitium Jurisdictionis acquirit in ipsos. Hos casus non debuisset colligere, sed rejicere in locum, ubi loquitur de Archiepiscopis & dicere duntaxat, hæc in *Regulâ* extare casus, qui Suffraganeorum Dicoesanos subjiciunt Archiepiscopi Jurisdictioni, & hunc aliquam in ipsos Jurisdictionem acquirere, quoad exercitium. *Quarta* loquitur de Exemptione, quæ Dicoesanos Episcopi subjicit alii Prælato; quâ proindè Prælati hic Jurisdictionem in illos acquirunt. Enumeratio Exemptionum ibi instituta, rejici debuisset in locum, ubi de Privilegiis agitur. Idem est de eo, quod dicitur in Replicationibus generalibus hujus *Regulæ*, & præcedentium, quod reducitur ad casus, in quibus cessat Exemptio, cujus discussio huic loco non congruebat. Satis vasta & gravis est Exemptionum materia, ut seorsim tractaretur: & quidem id præstitimus in speciali Tractatu de *Privilegiis*. R. G. V. de Jure dispensandi, argumento est aliena.

Dux Regulæ circa modum tuendæ Jurisdictionis, loquuntur solum de pœnis, quas incurrant ii, qui illam impediunt, vel se subicere recusant, priores Excommunicationi, posteriores Depositioni sunt obnoxii.

OBSERVATIONES in CAP. X. de Electione Prælatorum.

Secernere debuisset id, quod Prælati Regularibus peculiare est; quos videlicet esse Professos oportet, ut eligantur & eligant. Adjice, ætatem XXV. annorum sufficere, quoad illas Prælaturas; Electum indigere consensu Superioris, ad consentiendum Prælaturæ aliis Ordinibus. Quoad Abbatis, extant *Regulæ* speciales in *Cap. 43. de Elect. in 6.* Abbates possunt eligi ad alias Abbatis & Episcopatus; Episcopi autem *postulari* duntaxat possunt ad alios Episcopatus.

Secernenda quoque erant ea, quæ Postulationem attinent, ab iis, quæ Electionem respiciunt; atque ab hac incipiendo, illam ad calcem Tractatus de *Electione* ejicere oportuisset; quoniam est Electio gratiosa, quæ, cum dispensatione Superioris indigeat, vocatur *Postulatio*; de ipsâ loquendo, rebus tantum ipsi peculiaribus inhærendum fuisset, nempe defectibus, qui illam requirunt, vel qui illam excludunt; ejus formæ, & numero votorum necessario, cum illa concurrat cum Electione, vel ab hac separatur; effectui postulationis Superiori oblata, qui est impedire revocationem ejus. Utrumque præstitimus in Tractatu de *Electione*. Divisio ejus, quem hic Autor tradit, luculenta est, sitque in *Questiones IX.* videlicet 1. Quis possit eligi. 2. Quis eligere. 3. Per quem Jus illud exerceri possit. 4. Quando; 5. Ubi. 6. Antecedentia Electionem. 7. Modus eam faciendi, & Adjuncta. 8. Ejus Confectaria. 9. Affinia. *Quæst. III. V. VI. & IX.* duobus aut tribus verbis continentur: *Quæst. I. II. & VIII.* latius patent, & merito; cum sint longè majoris momenti.

Q U Æ S T I O I.

Prima, loquens de Qualitatibus in Eligendo requisitis, solvi potuisset, per unicam *Regulam*, & remissionem ad ea, quæ dicta sunt circa qualitates requisitas ad Ordines & Beneficia. *Regula* est, Leges, quæ illas dotes definiunt, esse prohibitivas; ejus autem ge-

neris Leges admittere omnes, quoscumque non excludunt: porro, Personæ, quæ excluduntur ab Electione passivâ, eadem sunt, quæ excluduntur ab Ordinibus & Beneficiis; eâ nempe, quæ, ratione hujus exclusionis, *Irregulares* vocantur, de quibus locuti sumus minutissime in Tractatu de *Irregularitate* considerata in speciebus suis; quæ non magis ad Ordines pertinent, quàm ad Beneficia, in quibus Electio locum habet: nam Prælaturæ, quæ sunt electivæ, requirunt Ordines; & Beneficia, quæ verè electiva sunt, eisdem requirunt. Quod dictum fuit de Irregularitate, locum habet quoad omnes Censuras personales, quæ sub hoc respectu eundem effectum operantur.

Si inter dotes ad Ordines requisitas, quædam non requirerentur ad Beneficia electiva; vel, è contra, quædam necessaria essent ad Beneficia hæc, non verè necessaria ad Ordines, quod quidem nos latet, satis fuisset illas observare.

Q U Æ S T I O II.

Prinquàm hujus *Questionis* *Regulæ* discutiantur, tria, quæ ibi omittuntur, sunt observanda; scilicet 1. Jus eligendi pertinere ad membra Collegii, cui dandum est Caput, aliud-ve Membrum substituendum loco defuncti, aut segregati, aut cedentis, aut translati; quod æquissimum est; cum uniuscujusque ex illis interfit in illa electione. 2. Si quis eorum isto jure careat, id cautum fuisse per aliquam Legem prohibitivam, quæ illum excludit. 3. Cum jus eligendi spirituale sit, oportere, ut omnes, qui suspensi sunt ab hujusmodi jure, vel qui illud in perpetuum amiserunt, vel pro unâ vice, sint ex iis, quos à jure eligendi Leges excludunt; proindè cum Irregularitas Censuræ personalis, Excommunicationis Majoris, Suspensionis totalis, aut ab Officio, vel à Muneribus Beneficii, operentur hunc effectum, sequitur, eos, qui aliquâ Irregularitate implicantur, aut Censurâ innodantur, non posse eligere: idem juris est quoad omnes, qui actiones patnaverunt eligendi jure *ipso facto* privantes.

His igitur de causis, omnes *Regulæ* hic ab Autore collectæ rediguntur ad aliquod ex observatis Capitibus, & singuli Canones, quos laudat, sunt prohibitivi, vel in verbis, vel in sensu: quantumcumque afferatur attentio, statim id legenti patet; itaque, sufficeret observare, Exceptiones *Regulæ I.* loqui de iis, qui excluduntur à jure eligendi, & sub hoc respectu, discrepare ab aliis *Regulis*, quæ illorum mentionem ipsamet faciunt: nullum esse ordinem in enumeratione, quæ legitur in utrisque: multa esse, quæ pertinent ad alias *Questiones*; quod enim dicitur de Procuratoribus, pertinet ad *Tertiam*; quod dicitur de Loco, pertinet ad *Quintam*; quod dicitur de Compromisso, pertinet ad *Septimam*: quod dicitur de amissione juris eligendi, ob Electionem personæ indignæ, aut incapacis, pertinet ad *Octavam*: quod dicitur de Devolutione, pertinet ad *Quartam*.

Ad disponendas ordine genuino Personas, quæ excluduntur à jure eligendi, incipere oportet à Populo, sive Laicis, qui hodie sunt prorsus incapaces, ratione sui status; tum pergendum ad Clericos aliarum Ecclesiarum, qui excluduntur, quoniam non sunt ex Collegio; indè, ad Impuberes, qui non habent ætatem; deindè ad Personas justæ ætatis, quæ non habent Ordinem requisitum; tum ad eos, qui habentes qualitatem utramque, sunt absentes, & Procuratores non nominarunt; Indè transeundum ad eos, qui aliquâ Censurâ, aut Irregularitate innodantur; & quorum jus propterea suspenditur, denique ad Collegium, quod jus suum amisit, vel propter Electionem tempore legitime neglectam, vel propter Electionem Personæ indignæ, ratione Morum, vel ignorantie, aut incapacis, ratione defectuum suorum, non criminalium, vel quia jus suum in alios trans-

transfudit per Compromissum; vel quia suspensum est ab Actibus, qui fiunt in communi; vel quia lapsus est in aliquod è Criminibus illo jure privantibus, puta Hæresim, Schisma, Simoniam, Læsam Majestatem.

QUÆSTIO III.

Hic colligenda erant omnia, quæ respiciunt Procuratores, ad eligendum constitutos; circa quos requiritur, ut habeant Mandatum speciale; sint è Collegio; & capaces eligendi ipsi suo nomine proprio; quid faciendum sit, cum plures sunt; casus, in quibus illi constitui nequeunt.

QUÆSTIO. IV.

Omnes Exceptiones & Replicationes *Regula I.* sunt inutiles, & comprehendere debent in Regula, quæ dicit, Electionem toties habere locum, quoties Sedes vorè vacaverit, quod accidit non solum in Casu mortis, sed etiam depositionis & abdicationis, sive expressæ, sive tacitæ, quæ fit per Professionem Religiosam, aut per Translationem. Regulam restringimus ad veram vacationem; nam interpretativa non sufficit: talis est ea, quæ provenit ex suspensione perpetua, sive totali, sive ab Officiis Pontificalibus, vel ex captivitate, vel ex furore.

Hoc peculiare est Vacationi per mortem, quod expectandum sit, donec Prælati sit sepultus, imò sunt Canonici, qui prohibeant eligere antè tertium à Depositione, aut Sepultura, diem; sed abrogati sunt *Reg. II. III.*

Idem dicendum de *Reg. IV.* ac de *I.* fert illa, Electionem fieri debere intra tres menses: adjiciendum est, *salvo Casu legitimi impedimenti*, ex illo enim Casu trahuntur Exceptiones. Itaque, converti debent in exempla legitimi obstaculi; nam tempus adversus eos non currit, qui justè impediuntur; & ad judicandum de justitiâ impedimenti, discutienda sunt exempla allegata. Porro in *Primâ* agitur de alia Electione celebranda, non à Collegio, quod Jus suum amittit ob negligentiam suam, sed à Superiore, ad quem Jus est devolutum, & cui idcirco spatium trimestre competit. Idem est de *Tertiâ*; nam Electio, quæ fit ab Electoribus, post cassationem primæ, ob defectum occultum Electi, sibi ignotum, est nova Electio, ad quam tres Menses rursus concedendi sunt. Exemplum, quod in Exceptione *II.* legitur, est congruum; nam sumitur ex morâ à Superiore proveniente, sine cujus permissione procedi non poterat ad Electionem.

Reg. V. Expositione indiget: dicit, procedi non debere ad novam Electionem, pendente appellatione circa primam, nam plura sunt genera appellationis circa Electionem: alia est *Extrajudicialia*, quæ fit appellando ab omni Electione, quæ non erit Canonica, vel quæ fit alio modo, quam qui proponitur ab Appellantibus; appellatio hæc non suspendit Electionem, sed fit, ut hæc sit Canonica, vel fiat modo proposito; suumque effectum non parit, nisi postquam Electio facta fuit contra formam appellationis. Appellatio hæc exolevit. Præterea, ex quo Concilium *Lateranense IV.* formam Electionis præscripsit, ejusmodi Appellatio fatilis esset, in secundo casu,posito quod forma proposita adversaretur formæ Concilii.

Alia appellatio est *Judicialia*, & locum habet in casu Controversiæ circa Electionem, aut jam perfectam, aut inchoatam. Appellatio hæc annihilat Electionem, quæ fit priusquam prima Instantia sit absoluta. Vid. *Cap. II. & 19. de Elect. & GONZAL. ibid.*

QUÆSTIO. V. VI.

Pro certo asserendum est, Electionem fieri debere in loco, ubi coeunt vulgò Comitatus Capitularia, & cum

Tom. I.

hic locus Ecclesiæ Cathedrali sit contiguus, vel aliqua pars istius Ecclesiæ destinata ad tales Conventus; dicitur, eam fieri debere in Ecclesiâ Cathedrali: sic intelligendum est *Cap. 25. de Appell.*

Suprà diximus, Electionem nonnunquam pendere à licentiâ Superioris, *Reg. II. Quæst. VI.* Exemplum hujus Juris suppeditat circa Electionem Patriarcharum, quæ celebrari non potest sine licentiâ Pontificis. *Cap. 3. de Elect. Extrav. Comm.* alia suppetunt exempla in Textibus collectis in Tractatu de *Electione*, ut offenderetur, esse Regiones, in quibus licentiâ Principis est necessaria.

Inter res Electioni prævias, Autor huic permissioni & convocatiōi Electorum, jungere debuit conventum Electorum, qui sunt in loco, qui fit ad præstituendum diem, quo Electio celebrabitur, nec non Nominationem plurium Personarum, è quibus una est eligenda: idem est de punitione eorum, qui Electionem impediunt. Itaque *Reg. XIX. Quæst. VIII.* collocari debuit sub *Quæst. VI.*

QUÆSTIO. VII.

Hic erat locus loquendi de Compromisso ad eligendum, quod est secundus è tribus modis eligendi approbatus à Concilio *Lateranensi IV.* & colligendi id, quod de illo Jus dicit in aliis Textibus, videlicet 1. Oportet, ut omnes vocem habentes in Capitulo consentiant Compromisso: illud debet concurrere cum Scrutinio, si inter illos ita convenerit: æquum est, ut Compromissarii sint in numero impari: licitum est convenire, quod in casu discordiæ, Compromissarius eliget eum, qui Concurrentes numero Suffragiorum vincit, quamvis non habeat majorem partem votorum Eligentium: quod fit à Compromissariis, est irritum, si potestatem suam egrediantur, aut eligant post revocationem Compromissi factam, priusquam processum inciperent, seu rebus integris; si elegerint Personam indignam, aut incapacem; si eligant post elapsos tres Menses: posito quod eorum Electio sit nulla, Jus ad Capitulum revertitur, nisi nullitas ex temporis lapsu proveniret.

Ad restituendum ordinem rebus, quæ Electioni adjunctæ sunt, considerandum est 1. Quot requirantur Suffragia, seu Vota. 2. Qualia esse debeant. 3. Eorum Publicatio. 4. Eorum Collatio. 5. Electio. 6. & ipsius Promulgatio.

Circa primum Caput dicendum est, majorem Partem votorum omnium Capitulantium requiri, posito quod illa conferant in Personam capacem & dignam. Aliàs Jus devolvitur ad Minorem, & Electio, quam facit hæc, est rata, modo Electus habeat qualitates requisitas, & forma fuerit observata: ad hoc reducitur id, quod legitur in *Reg. V.* ejusque Exceptionibus *XI.* cætera aut superflua sunt vel obsoleta. Sublata est necessitas, majorem Partem esse etiam saniores. Hodie numerantur voces; ponderari desierunt. Itaque Exceptio *I.* falsa est, item falsa est Replicatio hujus Exceptionis: nam Electio Monachi facta à minori parte semper nulla est; Textus laudatus id nominatim dicit.

Replicatio Exceptionis *IV.* perperam concipitur dicitur quod, si Pars, quæ eligit Personam solum postulabilem, dupla sit alterius, Electio hæc illam vincit, quæ facta est à minori. Dicendum erat, quod, si Postulatio superet Electionem tertiâ parte votorum Capitulantium, ipsa Electioni præferenda sit.

Exceptio *VIII.* est etiam falsa: nam, postquam Electio facta fuit à minori Parte Capitulantium, cæteri eam ratam habere nequeunt, illam approbando, *Cap. 29. de Elect. Cap. 42. 48. ibid.*

Quoad Electionem Pontificis, semper requiruntur duo trientia Cardinalium.

Suffragia occulta esse debent; absoluta; determinata ad unicam personam certam; & gratuita; collata ob meritum; minimè verò per gratiam.

D d

Quod

Quod dicitur de Secreto, non repugnat Textibus, qui clandestinas Electiones reprobant; nam Electio non est clandestina, nisi cum non promulgatur: Secretum durat solum, donec omnia Suffragia sint collecta, quo peracto, necessarii illa publicanda sunt, ut noscatur, an consentiant Electores; quod si accidat, Collatio non est necessaria; an verò dividantur, quo in casu discutendum est, an aliquis ex Electis tot votis juvetur, quot necessaria sunt ad Electionem validam, atque an illa Suffragia habeant qualitates requisitas: si de utroque constet, quod detegitur per Collationem, declarandum esse Electionem validam, esseque in favorem huius aut illius; si contrarium ex Collatione appareat, declaratur, non esse Electionem, quo in casu proceditur ad novum Scrutinium, donec una Electio valida fiat; quo in casu validitatis Electionis, sive primæ, sive posterioris, oportet, ut unus è Collegio ipsam promulget, & pronuntiet in nomine reliquorum. Porro, hæc sunt conditiones requisitæ ad Electionem completam, ordine genuino dispositæ, ad supplendum id, quod deest Collectioni Autoris. Ex his Conditionibus sequitur, Electionem non posse fieri per sortem. Cum fors cadere possit in aliquem carentem dotibus necessariis, vel minùs, quam par sit, illas habentem.

QUÆST. VIII. *Eventus & Consecraria Electionis.*

Principio Autor exponere debuisset generaliter omnia, quæ collocat sub hoc Titulo, quem valdè ampliavit. Eorum summam subjicio, 1. Notificatio Electionis facta Electo. 2. Tempus Electo datum, ad acceptandum, petendamve acceptandi licentiam, si non sit sui juris; 3. Appellatio ab Electione. 4. Ejus Confirmatio. 5. Postulatio Exceptionis adversus utramque, & contra Confirmationem. 6. Consecratio. 7. Pallium. 8. Communia horum Actuum, vel plurium ex iis.

Quatuor dantur *Regule* circa Caput I. quæ docent, Electionem esse præsentandam Electo, consensumque ipsius exquirendum; Si præsens sit, datur illi mensis ad deliberandum; si absens & remotus sit, expectatur sex menses; si Religiosus sit, ei certum tempus præstituitur, distantia ipsius ab ejus Superiore proportionatum, quo elapso, necdum impetratâ veniâ, quâ indiget, jure suo cadit. *Regula IV.* non loquitur de Electione, sed de Ordinatione Beneficiorum, quorum Ministerium Ecclesiæ necessarium est, & qui coguntur ad consentiendum, sub penâ Privationis sui Beneficii, nisi aliunde Ecclesiæ sint utiles.

Ab hac *Regulâ* usque ad XVIII. differitur de Appellatione, seu oppositione Electioni. Loqui solum oportebat de oppositione Electioni jam factæ: adjicitur tamen ea, quæ fit adversus Electionem futuram, & eam, quæ fit actu. Autor hæc operam insumit in iis colligendis, quæ necessaria sunt ad Appellationem generatim spectatam; circa quæ Lector remittendus erat ad id, quod dictum est suo loco. Quod dicit de Appellatione, sive ab Electione futurâ, sive ab inchoatâ, exigui usus est; quoniam ejusmodi Appellationes sunt abrogatæ. Speciale est Electioni, pendente Appellatione Judiciali consecræ, ut nulla sit, quamvis conferri soleat Matrimonio, quod, lite circa priores nuptias pendente, celebratum, ratum est & subsistit, postquam Matrimonium prius nullum fuit declaratum: Discrimen ex eo proveniens, quòd Ecclesia existimavit, interdictum celebrandi Matrimonii novi, pendente controversia circa validitatem prioris, tanti non esse momenti, ut impedimentum dirimens fieri debeat, secus autem judicavit de prohibitione novam Electionem celebrandi, antè cassationem prioris.

Quòd dicit *REG. XVIII.* in casu oppositionis executioni Electionis factæ, 1. Discutiendam esse qualitatem Personarum, quæ illam proponunt, 2. earum momenta, locum habet in Confirmatione, de quâ differitur à *REG. XXI.* usque ad XXX. inclusivè. Omissit dicere, nullum esse tempus præstitutum, ad obtinendam Confirmationem, & vitia personæ, quæ aliquem

incapacem Electionis passivæ faciunt, operari etiam incapacitatem accipiendæ Confirmationis. Omissit quoque id, quod Abbatissarum Confirmationi peculiare est. *Can. 5. DIST. LXV.* quem laudat. *REG. XXIII.* non loquitur de vero Primatu, sed de Metropolitanano, qui in Africâ *Primas* vocabatur: *Can. 4. laudatus ibid.* continet exemplum derogationis factæ à S. LEONE juribus Metropolitanorum, eos astringendo ad petendam licentiam à Primatu consecrandorum Suffraganeorum suorum, que in capite à Primatibus erant independentes.

Ultima Exceptio *Regule XXIX.* est inepta: nam Pontificis Electio non indiget Confirmatione, ejusque Coronatio est mera Carimonia, quæ nullam habet affirmativam cum Confirmatione.

Reg. XXXI. XXXII. XXXIII. respiciunt Postulationem, de quâ seorsim agendum fuisset, & observandum, quod illi peculiare est, juxta nostram notam hic in principio.

Reg. XXXIV. pertinet ad objectiones, quæ adversus Electionem proponi possunt: ex undecim, quas colligit, præter generales, è Quæstionibus præcedentibus deductas, nulla est, quæ ad has non reducat; nam 1. *Prima* sumpta ex eo, quòd Pontifex Electionem prohibuit, pertinet ad casus, in quibus Electores potestate caruerunt. 2. Electio facta contra Canones aut Consuetudinem, pertinet ad omnes casus, in quibus observati non fuerunt Textus laudati, in Quæstionibus VIII. præcedentibus. 3. Electus ambitiosus non habet qualitates requisitas. 4. Appellatio suspendit Electorum potestatem. 5. Idem est effectus Compromissi. *Objectio VI. VII. VIII. & XI.* sunt alienæ, aut falsæ; namque, non licet Electoribus variare post Electionem. Crimen posterius Electioni non nocet, sed Confirmationi & Consecrationi. *Objectio IX.* non cadit in Electionem, nisi eum cassatio Confirmationis causam habet in nullitate Electionis. *Objectio X.* sumpta est ex defectu potestatis in Electo, ad consentiendum, qui v. gr. in alienâ potestate constitutus est, quales sunt Religiosi.

REG. à XXXV. usque ad XLVIII. pertinent ad Consecrationem. Observandum erat, omnia vitia & crimina, quæ ab Electione & Confirmatione passivis excludunt, excludere quoque à fortiori, à Consecratione: hanc Jure Communi pertinere ad eum, cujus est confirmare: Ex quo Electio non fit ab Episcopis Provinciæ, consensum illorum non requiri ad Confirmationem; proindè, quod legitur sub fine *Reg. XXXIX.* dissentientibus Episcopis pluralitatem votorum vincere, ex multis retrò sæculis abrogatum est.

Reg. XXXVII. locum habet in Confirmatione, quæ delegari potest, perindè ac Consecratio.

Nota in *REG. XXIII.* producenda est ad *REG. XXXVIII.* in quâ laudantur iidem Canones.

REG. à XLIX. ad LIX. quod legitur in L. peculiare est Consecrationi Pallii collatæ cum Confirmatione, & Consecratione; nempe oppositio alicujus criminis, eam non retardat; nisi Opponens juret, se credere, crimen esse verum; caveat, se illud infra duos menses probaturum, seque talionis penæ subjiciat.

Textus *REG. LVIII.* qui probant, Archiepiscopum uti posse Pallio in totâ sua Provinciâ, non probant, Primatem aut Patriarcham eodem jure frui posse in Primatiâ, aut Patriarchatu, quamvis utrumque Territorium idem sit eorum respectu, ac Provincia respectu Archiepiscopi: agitur enim de Privilegio, quod strictam interpretationem accipere debet.

REGULÆ VIII. novissimæ Quæstionis hujus, quarum argumentum promiscuum est, aliis ad Electionem, aliis ad Consecrationem, sive Ordinationem, vel ad casus dispensationis circa utramque, aliis ad Confirmationem pertinentibus, nihil continent, quod non facile referatur ad aliquam è Quæstionibus præcedentibus, vel ad aliquam partem hujus: sed id tanti non est momenti, ut in hoc operam ludamus; sufficit observare, 1. *Primam*, nimis generalem esse; nempe, sumptus Electionis accipi è Bonis Ecclesiæ: nam expen-